

《天津政俗沿革记》卷三

水利〔营田 堤坝〕

〔折湍流，款旷陂，俾清流浸润，洒之畎亩，化卤田而为甘壤，粳黍稼穡不可胜数。农夫熙怡悦豫，相与讴歌疆畔，此非西门起邺，信臣治穰之政耶？津民苦河为患久矣，每岁水大，至辄夺百姓谷土膏腴之地。然前明汪应蛟、清初怡贤亲王及近世李鸿章，因高卑之宜，藉溉灌之便，创业农事，皆能富国饶人。其他若通甯濬，增堤防，盖亦足纪焉。而暂劳终不如永逸也，世有西门、信臣其人者乎？是所望于后之君子。自明以来，营田本末，别为编年体记之，其兴废得失之故，不待解说，可求而得也。并次之以堤坝。考旧志载：元立万户府，设左右翼屯田，是不在天津一隅也。经营天津屯田，实自明汪应蛟始，而肇端于徐贞明。〕

营田

明万历十四年，给事中徐贞明奏：顺天、真定、河间诸郡分建屯田，招徕南人，许其占籍；工部尚书郭朝宾以水田劳民，请俟异日。

万历二十五年，天津巡抚万世德题请开天津水田。万世德经略朝鲜，汪应蛟继之，申建前议，多格不行。

天启元年，御史左光斗用天津巡抚汪应蛟议，复天津屯田，令通判卢象观（点校按：当作卢观象）管理屯田水利。明年御史张慎言建言屯种，章下所司，令太仆卿董应举管天津至山海关屯田，开田十八万顷。

清康熙四十三年，户部议准天津总兵官蓝理奏：将天津沿海洼地仿南方开为水田，召募江南等处无业之民，安插天津，给与牛种，限年趋科。又将标兵，依前朝屯卫之制，入籍力田。

四十九年，户部议准直隶巡抚赵宏燮奏：查勘原任天津总兵官蓝理开垦水田一百五十顷，令天津参将蓝珠料理接种。

雍正四年，吏部等衙门议准怡亲王允祥、大学士朱轼奏：直隶兴修水利，请设京东、京西、京南、天津四局，设营田观察使。

八年，工部等衙门议准设河道总督一员，其营田事务归直隶总督管辖。

十三年谕：直隶营田乃皇考教稼善民之意，但事关地方，必须本地方有司实力奉行，将营田观察使撤回，专交地方官管理。

乾隆元年，裁直隶河道总督，以总督专管河务，直隶新旧营田归州县管理。

嘉庆二十五年谕：御史陈鸿条奏，兴修营田水利，雍正年间于近京设局经理，曾著有成效，著方受畴飭委委员，相度各河淀水势，仿照雍正年间成规，设法经理，并多方观导，使水田岁有增垦。

道光二十三年谕：讷尔经额奏，遵查天津至山海关一带，户口殷繁，地无遗利。其无人开垦之处，乃沿海碱滩潮水咸渍，不足以资灌溉，屯田之法，势难举行。所奏自是实在情形，著照议

办理。

咸丰九年，科尔沁亲王僧格林沁奏准：督饬兵弁于咸水沽营田三千五百四十亩，葛沽营田七百五十亩。

同治四年，万青藜、卞宝第奏请官荒地亩试垦水田。奉谕：咸丰年间，科尔沁亲王僧格林沁在大沽海口一带兴办水田，得稻田四千二百余顷。嗣经崇厚督员经理，使斥鹵之区咸为沃壤。今宁河、天津交界地方，查有官地，并据崇厚声称，军粮城一带临傍海河，但开渠二道，招佃垦种，可得稻田千余顷，即著崇厚复勘，以兴地利而裕民食。

光绪元年直隶总督李鸿章奏：僧亲王咸水沽、葛沽营田，招佃承种，叠遭水患，湮没无存。军粮城崇厚试垦四百七十余顷，计成熟不过十分之一，亦因连年被水，渐就荒芜。咸水沽一带荒地，承种无人，请饬周盛传督率防军，先于咸水沽、新城一带试垦稻田。

十六年，直隶总督李鸿章议覆御史洪良品直隶尽开水田条陈。奏称宋、元事远，难以取证；明代所营之田，非导山泉，即傍海潮，绝不引大河无节制之水，以资灌溉。即如天津地方曾饬周盛传试垦水田，此在潮汐可恃之地，若于腹地，大河经流，多分支派，穿穴堤防，恐欲富民而适以扰民，欲减水患而适以增水患也。开垦水田，只可因地制宜，以收一隅之益，断难全力大举，贪迂远无成之功。

二十二年，设小站营田垦务局，招佃垦种，岁纳租课。

堤坝一·防患

一曰陆公堤。明万历三十二年，教场口外决，浸城砖二十四层，河防同知陆敏捷筑护城堤一道，起自稽古寺前，绕城西南二面。一曰北运河堤，东岸自香河县起，曲折入县，至堤头村；西岸自废灤县码头起，至桃花店，由桃花店南至祇树园，以叠道代堤，可由祇树园至新庄，由新庄至三官庙。一曰南运河堤，东岸碾砣嘴、杨柳青、汪家庄、姜家井、小稍直口、教军场等处，筑有遥堤、缕堤、月堤，至三岔河口；西岸自碾砣嘴至三岔河北，赵家场、纸作坊等处，筑有遥堤、缕堤。一曰格淀堤，清康熙年修，在大清、子牙二河之间，自河间府庄儿头起，至天津西沽止。所谓格淀者，使格河淀而二之，使河自河，淀自淀也。一曰海河堤，自城东南马家口起，历靳家园、梁家园、贺家口、土城、双港闸、白塘口、咸水沽、葛沽，为海河西堤。自东门外至咸水沽，旧有叠道为往来通衢，乾隆四年，天津道陈宏谋因土圯残缺，请照遥堤之意，弃埝培道以御之，由直隶总督孙嘉淦奏准施行。此外则有西沽叠道、韩家树斜埝。光绪七年，直隶总督李鸿章奏陈直隶河工情形，称乾隆以后未兴大工，道、咸以后军需繁巨，更兼顾不遑。凡直属大河及各支河，原有闸坝、堤埝，无一不坏；减河、引河，无一不塞。观李鸿章所陈，可以知其大凡也。近岁钜工，则光绪十九年之堤头滚水坝也。李鸿章奏称：堤头地方适居三岔河口之上，距永定河、大清河下口三百丈，距北运河下口一百六十丈，距子牙河下口一百丈，距对岸叠道木桥九十余丈，系南运河北岸漫水归入之处。查该处为五大河群流总汇之区，堤外迤东一带，渐趋低下，开河泄水，甚为得势。现由此处修建滚水坝一座，直趋塌河淀心，正对金钟河口。以光绪十六年、十八年水势极大时计之，坝口过水七八尺，由坝入金钟河，循流入海，约可分泄五大河盛涨十分之四，有此别途，不致并入三岔河口，以专归海河。奏上，李鸿章委吴廷斌督修，吴廷斌即承修金钟河者也。

堤坝二·围田

白家圈、吴家嘴、白塘口、辛庄由静海划入县治，葛沽、盘沽、东西泥沽由沧州划入县治，均汪应蛟旧屯地址也。天津城南蓝田及贺家口围田，蓝理所开也。均经筑闸、筑埝，架桥梁，设涵

洞。旧志称蓝理立水田，并请建海光寺，延僧成衡为住持。寺外多成衡垦土，故环寺有渠通贺家口出海。复掘长短沟洫，以灌溉东西圈稻塍，此有明及清初之陈迹也。同治四年，崇厚奉命履勘水田。五年，新开水田，环渠在邢家沽。海河北岸起为上口，向北而东，由东而南，至卧河村通海河为下口。中渠一道，自北而南，至泥窝村，通海河。光绪元年，李鸿章奏令防军试垦稻田，称新旧营田均就荒废，因就咸水沽、新城一带试办屯田。其屯基在县治迤东，新城迤西，咸水沽迤南，在咸水沽口南流一里，建有大桥一道，曰通济桥。再二里有桥，曰问津桥。再六里有大闸一道，曰宣惠闸。闸东为水师营屯地、庄房、仁军屯地，西为盛字右军屯地。十二里至新农镇有闸曰肥兴闸，桥曰履丰桥。又东十里有桥曰观稼桥。又十五里有闸曰福润闸。又十里河分支，北流通南开，曰南开闸。又东行二十里有闸曰东安闸，距大沽口三里，地名三里坟。闸下即通海河。新农镇西河距镇十里，至中塘洼有闸曰富民闸。计开营田民、地十三万六千五百八亩五分，周围挖有界沟并筑长堤，与民地隔绝。每方格为二里，以线分军民界，线以内系营垦地，线以外为民地。

《天津政俗沿革记》卷三终